

□ उपन्यास अंस

कनक-सुंदर

शिवचन्द्र भरतिया

उपन्यासकार परिचै

शिवचन्द्र भरतिया रौ जलम वि. सं. 1910 में होयौ। भरतिया संस्कृत, हिंदी, मराठी अर राजस्थानी रा विद्वान हा। शिवचन्द्र भरतिया घणी विधावां रा रचनाकार हा। आप आधुनिक राजस्थानी गद्य लिखणियां में पैलड़ा उपन्यासकार मानीजै। केई विद्वान आपरै 'कनक-सुंदर' उपन्यास नैं राजस्थानी रौ पैलौ उपन्यास मानै। औ उपन्यास आप सन् 1903 में लिख्यौ। आप 'केसर विलास', 'फाटका जंजाळ', 'बुढापा की सगाई' (लघु नाटक), संगीत मानकुंवर आद केई नाटक लिख्या। 'मोत्यां की कंठी' आपरी पद्य-रचना है। आपरौ लेखन कथ्य अर सिल्प दोनू दीठ सूं राजस्थानी गद्य नैं सबळौ बणायौ। आपरै लेखन रा खास सुर है— देस री आजादी रौ चाव, जूनी संस्कृति नैं आधुनिक संस्कृति में वैग्यानिक रूप सूं ढाळणौ अर समाज-सुधार।

पाठ परिचै

'कनक-सुंदर' उपन्यास रो मूळ धेय है— समाज-सुधार। औ उपन्यास आदर्शवादी दीठ सूं रचीज्यौ है। उपन्यास सूं साच, मैणत अर ईमानदारी जैड़ा सफळता रा सूत्रां री आ सीख मिळै। मुरलीधर मैणत अर सचाई सूं राज अर समाज में घणा मानीता अर धनवान होय जावै। वारौ ब्यांव भाई-भाभी करावै। वारै लड़कौ होवै, उणरौ नांव कनक कढाईजै। उणरै सागै सुंदर पढै। दोनूं रौ ब्यांव होय जावै। आगै रौ हाल दूजै भाग में। दूजौ सायद लिखीज्यौ ई कोनी। इण में राजस्थानी जीवण रौ फूठरौ चित्रण होयौ है। उण समै री केई सामाजिक बुरायां अर समस्यावां भी प्रकास में आवै। उपन्यास माथै नाटक सैली रौ प्रभाव दीखै। उपन्यास घटना अर वरणन प्रधान है। साफ अर सरल अभिव्यक्ति आपरी भासा-सैली में सगळै प्रगटै।

'कनक-सुंदर' रौ अेक भाग ई साम्हीं आयौ, वौ भी मिळणौ दुरलभ है।

कनक-सुंदर

(1)

दोपहर दिन को बखत, च्यारां कानी लू चाल रही छै, हवा का जोर सूं बाळू अठी की उठीनै उड-उड कर बीं का नवा-नवा टीबा हो रह्या छै। ओर भींजण भी रह्या छै, मुंह ऊंचो कर सामनै चालणो मुस्कल छै, लू कपड़ा माहैं बड कर सारा सरीर नैं सिकताव कर रही छै। धूप इसी जोर की पड़ रही छै के जमीं ऊपर पग देणो मुस्कल छै। रस्ता माहैं दूर-दूर कठै ही झाड़ को नांव नहीं, बाळू उडकर जगां-जगां नवा टीबा होणै सूं रस्ता को ठिकाणौ नहीं, आदमी तौ दूर, रास्ता माहैं कोई जीव-जिनावर का भी दरसन नहीं, इसी बखत, अेक जवान आदमी, जिणकी उमर सोळा-सतरा बरस की थी, माथौ कपड़ा सूं बंध्यौ हुवौ, पीठ पर सामान की पोटळी लादयां हुवौ, हाथ माहैं लोटौ-

डोर लटकायौ हुवौ, हुस-हुस करतौ अजमेर कानी चल्थो आरह्यौ छै, रैती गरम होणै सूं पगां के चरका लागकर फोड़ा आ रह्या छै। तौ भी जोर सूं चाल रह्यौ छै। मन माँहें बार-बार बोल रह्यौ छै, कै “भाभी! साबास तनै! मनै थाळी पर सूं जीमता नै उठाकर घर छुड़ायौ! काँई हरकत छै? रामजी म्हां का भी दिन कदै ही लासी जरां आप ही म्हांकै पगां पड़ता फिरसौ! भाई तौ भाई छै! म्हेँ तौ जाणतौ थो कै म्हारै लार कोई दौड़सी पण मा बिना कीं नैं पीड़ आवै? आज मां होती तो म्हेँ घर बारै नीसरतौ काँई? इण तरह रा विचार करतौ हुवौ अजमेर की टेसण ऊपर दाखल हुयौ।

खंडवा तरफ की गाडी जावा नै हाल पांच-छै घंटां की देर थी। पीठ पर को बोझौ उतारनै नीचै राख्यौ। पाणी बिना मुंह सूक रह्यौ थो सू बिरामण कनै सूं लोटौ भर जळ लेकर, खूब मूंडौ धोकर, थोड़ौ जळ पियौ, जरां कुछ होस आयौ। उता माँहें अेक जणौ आकर इण मुसाफर को हाथ पकड़ कर बोल्यौ— जय गोपाळजी की भाई साहब! कठीनै की तैयारी छै? क्यूँ इण तरहै काँई?” बिना मिल्यां ही परभारा टेसण पर आया? साबास! इण तरहै चाहिजै।

—कुण भाई वंसीलाल जी? भला बखत ऊपर मिल्या! परभारा काँई। म्हांको बखत ही अबार इण तरहै को छै। घर माँहें सूं काढ दीनौ जरा थे तौ खाली दोस्त छौ, थांसू मिलकर काँई होणौ छै? इण तरहै मुसाफर उदासी सूं बोल्यौ।

वंसी.— वाह साब वाह! दुनिया माँहें दोस्त कै बराबर और कोई होतो होसी? मां-बाप सूं भी दोस्त ज्यादा काम आया करै छै। और साचा दोस्त की परीक्षा विपत पड़यांज हुवा करै छै, समझ्या मुरलीधरजी?

मुरली.— हां भाई! म्हेँ तौ गरीब आदमी छूं। म्हेँ काँई इसौ दोस्त कै लायक छूं सूं मनै कोई काम आवै? दुनिया माँहें पैसौ बडी चीज छै। पैसा वाळा का हजार दोस्त-सगासोई ओर भाईबंध छै।

वंसी.— अब आ पोटली-वींटली लेकर कठीनै? परदेस जाणै को विचार दीखै छै? ठीक! पण आज कै दिन तौ म्हांकै अठै चालौ, काल की गाडी माँहें रवाना हो जायीजौ।

मुरली.— नहीं भाई! अब मनै दोस्ती का फांसा माँहें मती नाखौ, अब मनै जाबा दौ। श्रीजी की कृपा सूं अणचींत्यौ मिळाप भी होयग्यौ। फेर आपकै अठै चालकर काँई करणौ छै?

इण तरै मुरलीधर जी तिरस्कार-युक्त बोल्या खरा, पण मित्रता की मूर्ति सामनै खड़ी रहकर उणका हृदय कंपित करबा लागी। जाणै वंसीलालजी नै छोड़बा को दिल होवै नहीं और उणकै साथ उणकै अठै जाणै को भी दिल होवै नहीं। खूब धूप माँहें घबराता-घबराता जोर सूं पांव उठाकर, जाणै गाडी की टैम मिलसी कै नहीं? तिकासूँ दौड़ता-दौड़ता आया और जाणै की तैयारी पक्की हो गई। कठै ही दिल रुकबा नै जबा रही नहीं, इतना माँहें वंसीलालजी को मिळाप हो गयौ और मन दुवध्या माँहें पड़्यौ।

वंसीलालजी पूरौ आग्रह करनै आपका मित्र मुरलीधरजी नैं घरा ले गया। बिचारा मुरलीधरजी धूप की तीव्रता सूं, चित्त की व्याकुलता सूं और क्षुधा की आतुरता सूं घणा श्रमी हो गया था, जमीं पर पग धरकर उठावणौ मुस्कल थो, तो भी प्रेम की रस्सी सूं खींचीजता हुवा वंसीलालजी कै अठै पूगा। घरां जातां पाण वंसीलालजी मुरलीधरजी को घणा प्रेम सूं आदर-सत्कार कीनौ। अर रसोई तैयार करायनै जिमाया। साम का दोन्यूँ मिलकर हकीकत पूछी। सुणकर अचंबै रह्या। रात का रसोई जीम सुख-दुख की वातां करने आराम कीनौ।

(2)

खंडवा की रचना ठीक छै। मोटौ स्रैर भी नहीं और छोटौ गांवडौ भी नहीं। टेसण को गांव होणै सूं रात-दिन लोगां को आणौ-जाणौ बण्यौ रहतौ। बैपार लंबौ-सो थो नहीं तौ भी मेहनत मजूरी वाळा नैं निभाव की जगा थी। मुरलीधरजी उठै अेक छोटी-सी कोटड़ी भाड़ा सूं लेकर रहबा लाग्या। चास्यां कानी फिरकर गांव देख्यौ। फेरी सूं कपड़ौ बेचबा को इरादौ कीनौ, किरकोल कपड़ौ, छींटां का टुकड़ा वगैरा दस-पंदरा रुपिया का घणी जांच करनै फायदा सूं लीना और फेरी देणी सरू कीनी। विचार कीनौ कै कपड़ा ऊपर थोड़ौ नफौ रखकर गिरायक नैं अेकज भाव

बोलणौ, माल बिकौ अथवा मत बिकौ, पहलै दिन सारा गांव माँहै फेरी दीनी, पण अेक भाव बोलणै सूँ कुछ बिकरी हुयी नहीं। मुरलीधरजी दिल का पक्का और हीमत का पूरा। अेक निश्चय कर लीनौ कै झूठ तौ बोलणौ ज नहीं, क्यूँ भी हो सचावट राखणी, देखां भला काँई परिणाम होवै? दो-तीन दिन इण तरहै ही गया। फेर थोड़ौ-थोड़ौ कपड़ौ बिकवा लाग्यौ। लोगां नैं मालम हो गयी कै बाण्यौ अेक बात बोलै छै, फेर उण माँहै कमी-ज्यादा करै नहीं। महिना-पंदरा दिनां पीछै बिकरी आछी होवा लाग गयी। ऊपर को ऊपर माल बेचकर जका को कपड़ौ लाता बीनै पैसा चुका देता। इण तरहै थोड़ा दिनां माँहै तीन-चार सौ की पूंजी हो गयी।

सांच नै आंच नहीं— सचावट दुनिया माँहै मोटी चीज छै। सच्चा आदमी पर सारां को विस्वास बैठ जावै। विस्वास बैठ्यां पीछै कोई बात की कमती नहीं, सांच नैं कटै भी डर नहीं, धोकौ नहीं और खराबौ नहीं, सांच ऊपर सूर्य, चंद्र, तारा, प्रथ्वी चाल रह्या छै। सांच ऊपर राज्य को पायौ छै। सांच ऊपर वौपार की इमारत छै। सांच की लछमी बंधी हुई छै। जिण आदमी के पास सांच छै, उणकै सामनै अस्तसिद्धि-नवनिधि हाथ जोड़कर खड़्या छै। सांच के वसीभूत प्रत्यक्ष नारायण छै, सांच बिना सोभा नहीं, आबरू नहीं, धन नहीं, मान नहीं, कुछ भी नहीं, किसी भी विपत पड़ै, किसौ परसंग आवौ, सांच नैं छोड़णौ नहीं। राजा हरिसचंद्र सांच के वास्तै राज गमायौ, लुगाई-बेटा नैं गमाया, आप बिकग्यौ, नाना प्रकार का संकट भोग्या, पण सांच छोडी नहीं! नळ राजा महा संकट भोग्यौ पण सांच छोडी नहीं। पांडवां राज गमायौ, वनवास भोग्यौ, पण सांच छोडी नहीं। इण तरहै ही म्हांका मुरलीधरजी सांच ऊपर कमर बांधकर सांच को पूरौ-पूरौ आश्रय लीनौ।

इण सचावट सूँ खंडवा माँहै सारा ही मुरलीधरजी की सोभा करवा लाग गया। उण पर सारां को पूरौ-पूरौ विस्वास बैठ गयौ। अब कपड़ों कै ताँई बराणपुर, भुसावल, जळगांव तोड़ी जावा लाग गया। हजारों रुपियां को माल उधार मिलबा लाग गयौ। दुकान पर हर कपड़ा का थान ऊपर कीमत की चट्टियां मार दीनी। अेक फरदी करनै बार सूँ हर भाव का थान, नामूद कर दीना, इण तरहै की साख बंधी कै भाव बोलणै की कीनै जरूरत रही नहीं। कोई भी गिरायक साबत थान लेवै तौ थान पर रुपिया मंड्योड़ा देख कर बिना बोल्यां देय जावै। और किरकोल वाळा फरदी माँहै भाव देखकर दाम देय जावै। डेढ दो बरस माँहै मुरलीधरजी आठ-दस हजार का मालक बण गया।

‘उत्तम खेती, मध्यम वौपार, कनिस्त चाकरी और भीख निदान’ कहावत छै। खेती ऊपर तौ आपणौ सारौ ही देस छै। वौपार मध्यम कह्यौ छै, पण पारासर ऋसि को कहणौ छै कै वौपार माँहै लक्ष्मी पूरी, बीं सूँ आधी खेती माँहै, बीं सूँ आधी राजा री नौकरी माँहै और भीख माँहै तौ कुछ भी नहीं, इसी वास्तै वौपार सारा सूँ घणौ ऊंचौ अर श्रेष्ठ छै, बीं को पार नहीं, अंग्रेज लोगां इत्ती बडी सत्ता और वैभव वौपार का कारण सूँज संपादन कीना छै। वौपार को मुख्य पायौ तथा आधार साच, उद्योग और नियमितपणा पर छै। टापटीप, व्यवस्थितपणौ, अेक बात, बखत की बखत भुगतावण, मीठी बात, नरमाई और गिरायक को आदर-सत्कार अै वौपार का अंग छै, अंग्रेज लोग मिट्टी को सोनौ कर रह्या छै। बै लोग कोई काम माँहै फस भी जावै तौ बींकौ पीछौ छोड कर निरास होकर बैठै नहीं, पूरौ पीसौ लेकर बीं काम नैं सेवट लेय जावै। आज सारौ दुनिया भर को वौपार उण लोगां कै हाथ माँहै छै।

(3)

अेक दिन इठै का बडा साहब कानी सूँ कपड़ौ-लत्तौ और किरकोल माल की फैरिस्त आयी तिका मुरलीधरजी आपका भाई नैं दीनी और कह्यौ कै फैरिस्त मुजब सारौ माल आपणा आदमी कै साथ देकर, माल की कीमत बराबर लगाकर, बीजक साथ देकर, भेज दियो। तिका परवाणै हजारीमलजी सारौ माल निकाळ कर गुमास्ता कनै सूँ बीजक लिखवाय नै भेज दीनौ। साम का मुरलीधरजी जमा-खरच देखबा लाग्या। साहेब का नांव सूँ माल नोंध्योड़ै देख्यौ। सारा माल की कीमत बराबर थी, परंतु काळी बनात को थान, जका की कीमत खरच नफा सूधा नौ रुपिया वार की थी सूँ हजारीमलजी जाण-बूझकर बारा रुपिया वार को भाव लगा दीनो थो। मुरलीधरजी देखकर चोंक उठ्या। और भाई नैं बोल्या कै औ काँई कीनौ? नौ कै ठिकाणै बारा कियान लगाया? आ बात आछी कीनी नहीं, बात नैं बट्टौ लगायौ।

हजारीमलजी सुणकर बोल्या कै काई हुवौ? चार-पांच सौ को माल गयौ जका माहँ अक बनात का दाम ज्यादा लगाया तौ काई हरकत छै? साहब लोगों को काम, बै किसा देखै छै?

मुरली.— (दोरा होकर) बै किसा देखै छै! नहीं-नहीं! नारायण तौ देखै छै ना? आदमी सूं तौ चोरी कर लेवां, पण श्रीजी कै आगै चोरी हो सकै काई? और इसी चोरी सूं फायदौ भी काई?

लाभ न होवै कपट सों, जो कीजै व्योपार।

जैसे हांडी काठ की, चढै न दूजी बार।।

ओ काम आछौ नहीं हुवौ, आज ताई म्हारौ नेम पूरै निभ्यौ, पण आज बीं को भंग हुवौ, मरजी नारायण की!

हजारी.— (नीचै झांककर) भाया! इण माहँ दोरौ होबा को काम काई छै? साहब नैं चिट्ठी लिखकर भूल सूं ज्यादा कीमत लगी सूं दाम करा ल्यौ। साहब तौ उल्टौ खुसी होसी, आगै इण माहँ कोई आछी बात होगी छै। जरां ओ इसौ काम हुवौ छै, भूलचूक को काई? भूलचूक तौ सदा लेणी-देणी छै।

मुरली.— (विचार माहँ) ठीक छै, आज ताई श्रीजी इण तरहै की म्हारा हाथ सूं भूल करायी नहीं, आज बडेरां का हाथ सूं हुयौ छै, सूं बोही नारायण सुधारसी।

इण तरहै बोलकर मुरलीधरजी झट अक अंग्रेजी लिखबा वाळा नैं बुलाकर घणी नम्रता सूं अक चिट्ठी साहब कै नाम लिखाकर भेजी कै म्हांका भाई की भूल सूं काळी बनात नौ रुपिया वार थी सूं बारा को भाव लगायौ गयौ छै, सूं बीजक दुरस्त करनै उता रुपिया भेज दीजौ।

साहब कै पास माल पूग गयौ थो। दो-चार साहब और भी था। उणां की मेम साहब भी थी। माल सारां कै पसंद आयौ। कीमत भी ठीक नजर आयी। काळी बनात देख रह्या था। आपकै पास की बनात इण बनात सूं मिलायी, अक बणाणै वाळौ, अक कारखानौ, अक नंबर, अक रंग और अक कपड़ौ, मेमसाहब नैं भाव पूछ्यौ तौ बोल्या कै तैरा का भाव की ममोई सूं आयी छै, जरां साहब नैं बडो अचरज आयौ कै जो चीज ममोई माहँ तैरा का भाव की बिकै सूं अठै बारा का भाव की कियान मिलसी? इण तरहै सारौ ही माल किफायत वार छै। जाण-बूझकर बाण्यौ कठै कीमत तौ कमी लगायी नहीं छै? आजू-बाजू का सारा ही लोग बोलबा लाग्या कै साहब! नहीं बाण्यौ घणौज ईमानदार आदमी छै। आप मोटा साहब छौ तौ भी बौ ही भाव और कोई गरीब जासी तौ भी बौ ही भाव, कमती-ज्यादा को हिसाब बीकै पास छै नहीं। कीं सूं पाई ई अक को फरक नहीं। देसी लोगों माहँ इसौ वौपारी दूजौ कोई देखण माहँ छै नहीं। इण तरहै वातां हो रही छै।

इत्ता माहँ मुरलीधरजी की चिट्ठी लेकर उणको आदमी आयौ। साहब नैं चिट्ठी दीनी, साहब चिट्ठी बांचकर अचंबै रह्या। और समझ्या कै मनैं खुसी करबा की बाण्या की आ चालाकी दीखै छै, इण माहँ कोई सक नहीं, फेर आपका सईस नैं बुलाकर बोल्या कै तूं अँ नौ रुपिया थारै पास रख, और मुरलीधर सेठ की दुकान ऊपर जाकर ऊंची सूं ऊंची काळी बनात अक बार मांग, वार का नौ रुपिया मांगै तौ देकर लेय आ, ज्यादा दाम बोलै तौ पीछै आकर कमी रैवै सूं रुपिया लेय जाकर फेर लेय आ, तूं म्हारौ सईस छै जिकौ पतौ दीजे मती, पूछै तौ महु-को छावणी को छूं करनै बोलजै।

सईस झट मुरलीधरजी की दुकान पर जाकर ऊंची सूं ऊंची काळी बनात मांगी। वार भरका दाम वै ही नौ रुपिया मांग्या। बनात फाड़ दी और रुपिया नौ लेय लीना। बनात को टुकड़ौ लेकर सईस साहब कै पास आयौ। साहब पहली की बनात सूं मिला लीनी, उणकी खातरी हो गयी, घर माहँ सूं सरकारी बार मंगा कर नापी। बराबर भरी, साहब झट आपकी डायरी माहँ मुरलीधरजी को नांव नोंध लीनौ, और लिख रख्यौ कै 'रायबहादुर' की खिताब देणै माफक ओ बाण्यौ छै। फेर कित्ती ही वार इण कै अठै सूं माल मंगाया पण पाई को फरक पड़्यौ नहीं। सरकारी कामकाज माहँ भी मुरलीधरजी नैं बुलाया, परंतु सारी बात सूं उणकी सचावट पायी गयी और सारां लोगों का मूं सूं

इण नर की बार-बार जटै-उटै सोभा ही सुणी, साहब की बाल-बाल खातरी हो गयी। और 'रायबहादुर' की खिताब देणै कै वास्तै सरकार माहें मुरलीधरजी की सिफारिस कर दीनी।

ॐॐ

अबखा सबदां रा अरथ

छै=है। भींजण=बिखरणौ। चरका=बाळू पर पग बळणा। फोड़ा=फफोला, घाव। जरां=तद, तब। सगासोई=सगा-संबंधी। फांसा=फंदा। श्रमी=थाकग्या। फेरी=घूम-घूमनै कोई चीज बेचणी। परसंग=स्थिति, अवसर। तोड़ी=तक। फरदी=सूची, फेहरिस्त। नामूद=प्रगट। किरकोल=खुदरा। संपादन=आछी हासल, प्राप्ति। ठिकाणै=ठौड़ माथै, स्थान पर। बाण्यौ=बाणियौ, वौपारी। वाद भरका=गज रौ नाप। खातरी=आव-आदर, मान-मनवार।

सवाल

विकळपाऊ पडूत्तर वाळा सवाल

- “भाभी! साबास तनै। मनै थाळी पर सूं जीमता नै उठाकर घर छुडायौ।”
इण वाक्य में किसौ भाव छिप्यौ है?
(अ) तारीफ रौ (ब) निरासा रौ
(स) खीज रौ (द) अभिमान रौ
()
- “जमीं पर पग धरकर उठावणौ मुस्कल थो।”
मुरलीधरजी रौ जमीं पर पग धरकर उठावणौ क्यूं मुस्कल हौ?
(अ) वंसीलालजी रै तिरस्कार रै कारण (ब) भाभी रै वैवार रै कारण
(स) चित्त री व्याकुलता अर क्षुधा री आकुलता रै कारण (द) अणर्चीत्यौ मिळाप होवण सूं
()
- “साहब चिट्ठी बांचकर अचंबै रह्या।”
साहब चिट्ठी बांचनै अचंबै क्यूं रह्या?
(अ) चिट्ठी में बनात रा भाव बारै रुपिया री जगां नौ रुपिया लगाया हा
(ब) चिट्ठी में बाण्या री चालाकी दीखै ही
(स) चिट्ठी में बीजक रा भाव बधायनै लिख्योड़ा हा
(द) चिट्ठी में बिल रा रुपिया जल्दी भेजण रौ लिख्यौ हौ
()
- “रायबहादुर की खिताब देणै माफक औ बाण्यौ छै।”
साहब मुरलीधरजी नै खिताब देवणै री क्यूं सोची?
(अ) आछै व्यौहार खातर (ब) ईमानदारी खातर
(स) प्रसिद्धि रै कारण (द) लाभ पुगावण रै कारण
()

साब छोटा पड़तार वाळा सवाल

1. “हुस-हुस करतौ अजमेर कानी चल्थौ आ रह्यौ आदमी किण दसा में आय रह्यौ छै।” इणरौ वरणन करौ।
2. “साचा दोस्त की परीक्षा विपत पड़्यां ई हुया करै छै।” आ बात कुण, किणनै अर कद कही।
3. खंडवा माहें मुरलीधरजी की साख आछी क्यूं बणगी?
4. मुरलीधरजी साहब कै नाम चिट्ठी क्यूं लिखवाई?
5. मुरलीधरजी बाबत लोगां माहें काई बातां हो रही छै?

छोटा पड़तार वाळा सवाल

1. साहब नैं मुरलीधरजी रै सांच री खातरी कियां हुई?
2. पाठ रै आधार माथै गरमी री दोपहर रौ वरणन करौ।
3. ‘कनक-सुंदर’ उपन्यास रै मुजब खंडवा री रचना बाबत चार ओळ्यां लिखौ।
4. ‘सांच नैं आंच नहीं’ सांच री महिमा नैं बतावतां पांच ओळ्यां लिखौ।
5. वौपार रा अंग काई-काई छै?

लेखरूप पड़तार वाळा सवाल

1. ‘कनक-सुंदर’ उपन्यास रै नायक रौ चरित उकेरौ।
2. ‘ईमानदार व्यौहार सफळता रौ द्वार’, सिद्ध करौ।
3. नीचै लिखी ओळ्यां रै भावां रौ खुलासौ करौ—
 - (1) आज मां होती तौ म्हेँ घर बाँरै नीसरतौ काई?
 - (2) अक बनात का दाम ज्यादा लगाया तौ काई हरकत छै?
 - (3) आज ताई म्हारौ नेम पूरौ निभ्यौ, पण आज बीको भंग हुवौ, मरजी नारायण की!
4. नीचै लिख्योड़ा मुहावरां रौ अरथ लिखौ अर इणां सूँ अक-अक वाक्य बणावौ—
 - (1) मुंह ऊँचौ करनै चालणौ।
 - (2) पग देणौ मुस्कल होवणौ।
 - (3) पगां पड़तां फिरणौ।
 - (4) फांसा माहें नाखणौ।
 - (5) सोभा करणौ।
 - (6) अचंबै रहणौ।
 - (7) खातरी होवणौ।